



## ***Komunikadu Imprensa***

**06 Maiu 2013**

### **Tribunál Distritál Dili hala'ó rejlugamentu ba kazu omisídiu agravadu**

Iha 30 Abril 2013, Tribunál Distritál Dili hala'ó rejlugamentu ba kazu omisídiu agravadu ne'ebé komete husi arguida Maria de Lourdes hasoru Damião Soares, ne'ebé nu'udar membru F-FDTL (*Falintil – Forças Defesa de Timor Leste*) nomós hanesan arguida nia la'én. Kazu ne'e, akontese iha 25 Novembru 2011 iha Suco Comoro, Sub-Distritu Don Aleixo, Distritu Dili. Kazu ne'e rejista ho Nú. Prosesu 388/C.Ord/2012/TDD.

“JSMP preokupa tebes ho provizaun rejlugamentu ne'ebé define iha Kódigu Prosesu Penál aplikavel tanba prejudika interse justisa ba parte sira. Provizaun ne'e hatuur parte interesadu sira iha situasaun inserteza justisa no prejudika prinsípiu julgamentu ne'ebé lalais, baratu no serteza ba ema hotu.” dehan Luis de Oliveira Sampaio, Diretór Ezekutivu JSMP.

JSMP fiar katak mekanismu ne'e, atu kurize fallansu no erru ne'ebé akontese iha tribunál primeíra instânsia sira, maibé JSMP preokupa tanba provizaun ne'e prejudika teb-tebes interese justisa ba parte sira. JSMP rekomenda ba tribunál primeíru instânsia sira atu tenki fo atensaun no ho kuidadu atu haree didiak elementu prosesual sira tuir lei haruka, atu nune'é la bele prejudika justisa ba parte interesadu sira.

Iha rejlugamentu ne'e arguida deklarata katak nia sona vítima hanesan lijítima defeza tanba vítima kontinua atu baku nia. Arguida mós deklarata katak nia rasik maka kontaktu polísia tanba depois komete krime ne'e nia senti ta'uk.

Entretantu testemuña Sezartino Manuel do Amaral depoimentu katak nia la haree ho matan maibé haree vítima latan hela iha rai no tanba tauk família vítima maka nia hasees aan husi fatin akontesimentu. Testemuña seluk Isaac Virgilio Gonçalves Ximenes depoimentu katak haree arguida mak sona duni vítima.

Deklarasaun husi arguida, no depoimentu husi testemuñ na'in rua hanesan ho deklarasaun no depoimentus ne'ebé sira hato'ó uluk iha primeíru julgamentu.

Ministériu Públiku haktuir katak iha lora 25 Novembru 2011, tuku 23.00 kalan arguida, sona vítima dala ida iha nia hirus-matan hodi rezulta vítima mate keda iha fatin akontesimentu. Antes kazu ne'e akontese, vítima tebe arguida nia ain no rentós hafóin hader husi toba fatin. Hatan ba vítima nia hahalok ne'e arguida foti tudik iha rai no sona dala ida iha vítima nia hirus matan. Ministériu Públiku akuza arguida bazeia ba artigu 2, 35 Lei Kontra Violénsia Doméstika konjugadu ho artigu 139 (g) Kódigu Penál kona-ba omisídiu agravadu.

Kazu ida ne'e hahu julgamentu iha lora 20 Setembru 2012, no iha lora 6 Novembru 2012 Tribunál Distritál Dili hamonu akordaun hodi kondena arguida ho pena tinan 15 prizaun. Maibé parte arguida liu husi nia defeza la satisfas ho pena refere no hasae rekursu.

Depoisode avalia ba rekursu deside intrega fila fali kazu ida ne'e ba tribunál primeíra instansia hodi hala'ó rejulgamentu, tanba tribunál rekursu konsidera katak sei iha faktus balun presiza haree fila fali.

Julgamentu preside husi juizes kolektivu ne'ebé kompostu husi Dr. José Maria de Araújo, Dr. Júlio Gantes, no Dr. Duarte Tilman. Ministériu Públiku representa husi Dr. José Luis Landim. Arguida hetan defeza husi Dr. José da Silva husi Defensoria Públiku.

Akordaun ba kazu ne'e sei hala'ó iha loron 17 Maio 2013, tuku 09:00am

Atu hetan informasaun kle'an liu tan favor kontaktu:

Luis de Oliveira Sampaio

Diretór Ezekutivu JSMP

[info@jsmp.minihub.org](mailto:info@jsmp.minihub.org)

Telefone: 3323883 | 77295795

[www.jsmp.tl](http://www.jsmp.tl)